

## Tesalonika ponokon 'wano ijokonory kareta **Uwapo torupamy**

Moro Jesus weramatopo kurita poko oty anukuty'pa noro rapa pyime Tesalonika po Tamusi amyikanamon tywaije mandon. Ko'i terapa moro Kristus weramatopo kurita wairy man ekanopyry ke ty'waine, amyikon tamaminake'se tywaije mandon. Iro ke ro Paulus 'wa ero kareta tymero man. Moro moro wara iwonumen-garykon 'wa emaminake'karykon 'se'pa man.

### **Ero kareta wota'saka'san**

1:1-2 Kareta a'motopo auranano

1:3 - 2:17 Tamusi amyikanen ane'mere'ka'pa  
moro Kristus weramatopo kurita wairy man

3:1-15 Mo'karon Tamusi amyikanamon  
emamiry

3:16-18 Kareta y'ma'topo auranano

### *Kareta a'motopo auranano*

<sup>1</sup> Paulus, Silvanus maro, Timoteus maro enapa ero kareta merojan mo'karon Tesalonika po Tamusi na'nanopy'san apyimy 'wa mo'ko kyjumykon Tamusi ta, mo'ko Kyjopotorykon Jesus Kristus ta enapa. <sup>2</sup> Oro mo'ko kyjumykon Tamusi, mo'ko Jopoto Jesus Kristus enapa ty-turu'poporykon eneposen o'waine. Sara'me enapa ajysen.

*Moro a'wembono auranano ytopo kurita*

<sup>3</sup> O'kapyn roten Tamusi ety awongary man na'na 'wa apokoine, na'na a'sakarykon. Moro wara na'na wairy iru'pa man, moro o'waine Tamusi amyikary wepuiry ke, aseme noro poto me moro ase'wa awaipnarykon wairy ke enapa. <sup>4</sup> Iro ke ro aseke na'na kynotamyikanon apokoine pa'poro mo'karon Tamusi na'nanopy'san apy-imykon 'wa. Kynotamyikanon na'na moro Tamusi amyikary ta aweja'nakarykon pokon morokon kari'na erekuru 'wa awekenarykon se'me, akota'marykon se'me enapa. <sup>5</sup> Morokon otykon ro iru'pyn a'wembono auranano ynen Jopoto me Tamusi ekari'san. Iru'pa ajepota'ton moro tynundymary tanokon me. Moro waton me ro irombo maikota'maton. <sup>6</sup> Tamusi iru'pyn a'wembono auranano ytan. Mo'karon akota'manamon kota'mapotan. <sup>7</sup> Akota'marykon wyino ajeremapota'ton, na'na eremapory man wara enapa. Moro wara Tamusi kynaitan moro kapu wyino mo'karon kapu tanokon pari'pyngon tapojongan maro mo'ko Jopoto Jesus wonepory jako <sup>8</sup> wa'to ka'muru ta. Mo'karon Tamusi anukuty'non kota'matan. Mo'karon mo'ko Kyjopotorykon Jesus ekapory 'wa epanama'non kota'matan enapa. <sup>9</sup> Moro yja'wan me tywe'i'san epemata'ton ro i'matypyn uta'no ke tyse Tamusi wyino, moro ipori'tory kuranory wyino enapa.

<sup>10</sup> Moro wara ro kynaitan moro iwo'topo kuita, moro toty awongapo iwopyry jako mo'karon Tamusi wyinonokon 'wa, pa'poro mo'karon Tamusi amyikanamon 'wa. Amyjaron enapa

itaine maita'ton. Moro na'na namyikapory oka irombo tamyika o'waine man.

<sup>11</sup> Moro me ro enapa o'kapyn roten mo'ko kytamusirykon 'wa kynaurananon na'na apokoine, iru'pa ajepoto'ko'me i'wa moro ako'mato'konymbo 'wanokon me. Typori'tory ta pa'poro anisanorykon iru'pyn oty kapy'mapon o'waine, pa'poro tamyikanamon me anikapyrykon amaminano kapy'mapon enapa o'waine. <sup>12</sup> Iwara ro mo'ko Kyjopotorykon Jesus ety tawonga kynaitan otaine. Moro ajetykon enapa mo'ko ta tawonga kynaitan, mo'ko kytamusirykon turu'popory poko, mo'ko Jopoto Jesus Kristus turu'popory poko enapa.

## 2

### *Mo'ko Jopoto wo'topo kurita*

<sup>1</sup> Mo'ko Kyjopotorykon Jesus Kristus wopyry man poko, moro imaro kywota'nropyrykon man poko enapa kynoturupojan na'na o'waine, na'na a'sakarykon, <sup>2</sup> ko'i 'ne o'mere'kapo'pa awaito'ko'me, tare'ne atypo'pa awaito'ko'me enapa, amy a'kanano 'wa, amy auranano 'wa pai, amy na'na nimeropo ikato'kon kareta 'wa pai mo'ko Jopoto wo'topo kurita tunday ekaro'poto.

<sup>3</sup> Awomu'maporykon kapyn pairo man. Mo'ko Tamusi wyino atu'mano wopyry na'nen man. Mo'ko uta'toto man yja'wanympo imero kari'na wonepory na'nen man. <sup>4</sup> Pa'poro tamusi me kari'na nekarityry, pa'poro tamusi nendory wara

tynendomy oty y'tu'katan. Iko'poine pairo kawonaka kynotawongatan. Mo'ko Tamusi 'ne ro auty ta kynotandy'motan tamusi me tywairy enepoto'me tiro.

<sup>5</sup> Anukuty'pa noro mandon moro y'wa o'wanokon me pa'poro morokon otykon ekarity'san ajekosaine noro yja'ta? <sup>6</sup> Oty 'wa erome noro iwopyry a'kotory muku'saton. Moro iwonepotopo kurita te kynonepotan. <sup>7</sup> Maname irombo moro yja'wan me aino kynemaminanon terapa. Mo'ko yja'wan kari'na wonepory a'kotonen roten emimary noro man. <sup>8</sup> Irombo mero kynonepotan. Mo'ko wotan ro mo'ko Jopoto Jesus moro tyworemary ke, moro tywonepory ke enapa.

<sup>9</sup> Mo'ko Satan pori'tory ta kyno'tan pari'pe imero. Amu'mato aitonon pori'tonano enepotan. Anumengaponamon otykon enepotan enapa. <sup>10</sup> Tamero roten mo'karon uta'tonon man emu'matan. Moro taijomato'ko'manyombo aipynano 'ne ro anapo'i'pa irombo tywaije mandon. <sup>11</sup> Iro ke ro mo'ko Tamusi amy amu'mato aitoto pori'tonano emaminano'potan itaine, onapi amyikato'me i'waine. <sup>12</sup> Iwara ro pa'poro mo'karon iporono auranano anamyika'nonymbo, mo'karon yja'wan me aino 'se tywaije mandon inaron pokon a'wembono auranano ytan Tamusi.

<sup>13</sup> Na'na 'wa te o'kapyn roten Tamusi ety awongary man apokoine, Jopoto nipyinarykon na'na a'sakarykon. Tamusi 'wa irombo tapyije

mandon koromonokon me uta'no wyino ajunem-boto'ko'me mo'ko tywyinonokon me ajynamon ta'kary 'wa, moro o'waine moro iporono au-ranano amyikary 'wa enapa.

<sup>14</sup> Moro na'na nekarityry iru'pyn oka 'wa tyko'mapo i'wa mandon, mo'ko Kyjopotorykon Jesus Kristus kuranory apyito'me o'waine.

<sup>15</sup> Iro ke ko'wu aturu'san apyitoko, na'na a'sakarykon. Morokon na'na nekarity'san, na'na nimero'san pai omepano kysinondaton.

<sup>16-17</sup> Oro pa'poro anikapyrykon iru'pyn amam-inano ta, iru'pyn auranano ta pai apori'tomasen, aturu'san apokumasen enapa mo'ko Kyjopoto-rykon Jesus Kristus mo'ko kyjumykon Tamusi maro. Mo'ko Tamusi 'wa ro moro kypnarykon tanepo man. Moro tyturu'popory ta typori'toma i'wa kytaton, utapy'pa roten kywaito'ko'me. Amy iru'pyn oty tyje i'wa man kynimomokyrykon me.

### 3

#### *Typoko Tamusi 'wa auranano 'se Paulus wairy*

<sup>1</sup> Irombo ko'wu Tamusi 'wa na'na pokon aja-uranatoko, na'na a'sakarykon, moro Tamusi auran aripa'to'me, kawo iwaito'me enapa, moro ajeko-saine kawo iwairy wara. <sup>2</sup> Aturupotoko na'na unendo'me mo'karon to'mere'samon yja'wangon kari'na wyino. Pa'poro 'ne kari'na 'wa kapyn moro Tamusi amyikary man.

<sup>3</sup> Tamusi te tamyikapore man. Mo'ko ro apori'tomata'ton. Ajunenda'ton mo'ko yja'wan wyino. <sup>4</sup> Moro o'waine morokon na'na nekarityry otykon kapyry amyikanon na'na mo'ko

Jopoto ta. Moro mo'ja ro o'waine ikapyry man amyikanon enapa na'na. <sup>5</sup> Oro mo'ko Jopoto morokon aturu'san aron moro Tamusi pyny 'wa, moro Kristus ta ej'a'nakano 'wa enapa.

*Kari'na emaminary 'se Paulus wairy*

<sup>6</sup> Mo'ko Kyjopotorykon Jesus Kristus ety ta na'na kynganon o'waine, na'na a'sakarykon, tyse awaito'ko'me amy emepo'pa amandoto, moro na'na wyino tynapo'i'po omepano wara e'ipyn aja'sakarykon wyino. <sup>7</sup> Aseke irombo muku'saton one wara na'na we'i'po wara awairykon man. Emepo'pa kapyn irombo na'na ara'naine kynainen. <sup>8</sup> Amy pairo ekosa epemary pyndo arepa anenapy'pa na'na kynainen. Awosin pe tywo'mikary ta te koko, kurita na'na kynemaminan ajaki'ma'paine tywaito'me. <sup>9</sup> Na'na aina ro rypo man ajekosaine arepa enapyry ajepemarykon pyndo. Typoko te moro one wara awairykon man enepory 'se na'na kynainen. <sup>10</sup> Ajekosaine ta'ta irombo ero wara na'na kyngan o'waine: mo'ko tamaminary 'sepyn wairy man endame'pa enapa. <sup>11</sup> Emepo'pa amykon ara'nanokon emamyry etan irombo na'na. Emamina'pa mandon. Ty'wanokon me kapyn aitonon otykon pokote etaika'pa mandon. <sup>12</sup> Mo'kopangon urujan imero na'na mo'ko Jopoto Jesus Kristus ta, aseke tareparykon pokote ity'me emaminato'ko'me. <sup>13</sup> Amyjaron te, na'na a'sakarykon, iru'pyn oty ka'namon me arupotarykon kapyn man. <sup>14</sup> Mo'ko ero kareta ta na'na nimero'san otykon wara e'ipyn ekarotoko ase'wa. Imaro

awairykon kapyn man. Iwara pai kynepy'i'totan.  
<sup>15</sup> Ajenono'namon me te kysapyiton. Amy  
aja'sakarykon me te e'matoko.

*Kareta y'ma'topo aurano*

<sup>16</sup> Aseke te mo'ko sara'me aino undy Jopoto  
o'kapyn roten sara'me ajysen pa'poro oty ta.  
Mo'ko Jopoto pa'poro amaroine nainen.

<sup>17</sup> Aseke yjainary ke awu, Paulus, ero simeroja  
o'waine: “Iru'pa aitoko!” Moro wara ro  
pa'poro ynimerory kareta suku'poja ykaretary  
me. Yjainapory ro ero man. <sup>18</sup> Oro mo'ko  
Kyjopotorykon Jesus Kristus turu'popory pa'poro  
amaroine nainen.

**Asery Tamusi karetary  
New Testament in Carib (NS:car:Carib)**

copyright © 2010 Wycliffe Bible Translators, Inc.

Language: Carib

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 21 Feb 2024 from source  
files dated 29 Jan 2022

9d22e71c-0a69-5934-a8d6-b98c106e8efa